

# INCIPIT JOËL PROPHEA



# Contents



# INCIPIT JOËL PROPHETA

1 Verbum Domini, quod factum est ad Joël, filium Phatuel. <sup>2</sup> [Audite hoc, senes, et auribus percipite, omnes habitatores terræ: si factum est istud in diebus vestris, aut in diebus patrum vestrorum? <sup>3</sup> Super hoc filiis vestris narrate, et filii vestri filiis suis, et filii eorum generationi alteræ. <sup>4</sup> Residuum erucæ comedit locusta, et residuum locustæ comedit bruchus, et residuum bruchi comedit rubigo. <sup>5</sup> Expergiscimini, ebrii, et flete et ululate, omnes qui bibitis vinum in dulcedine, quoniam periit ab ore vestro. <sup>6</sup> Gens enim ascendit super terram meam, fortis et innumerabilis: dentes ejus ut dentes leonis, et molares ejus ut catuli leonis. <sup>7</sup> Posuit vineam meam in desertum, et ficum meam decorticavit; nudans spoliavit eam, et projecit: albi facti sunt rami ejus. <sup>8</sup> Plange quasi virgo accincta sacco super virum pubertatis suæ. <sup>9</sup> Periit sacrificium et libatio de domo Domini; luxerunt sacerdotes, ministri Domini. <sup>10</sup> Depopulata est regio, luxit humus, quoniam devastatum est triticum, confusum est vinum, elanguit oleum. <sup>11</sup> Confusi sunt agricolæ, ululaverunt vinitores super frumento et hordeo, quia periit messis agri. <sup>12</sup> Vineam confusa est, et ficus elanguit; malogranatum, et palma, et malum, et omnia ligna agri aruerunt, quia confusum est gaudium a filiis hominum. <sup>13</sup> Accingite vos, et plangite, sacerdotes: ululate, ministri altaris; ingredimini, cubate in sacco, ministri Dei mei, quoniam interiit de domo Dei vestri sacrificium et libatio. <sup>14</sup> Sanctificate jejunium, vocate cœtum, congregate senes, omnes habitatores terræ in domum Dei vestri, et clamate ad Dominum: <sup>15</sup> A, a, a, diei ! quia prope est dies Domini, et quasi vastitas a potente veniet. <sup>16</sup> Numquid non coram oculis vestris alimenta perierunt de domo Dei nostri, lætitia et exultatio? <sup>17</sup> Computruerunt jumenta in stercore suo, demolita sunt horrea, dissipatæ sunt apothecæ, quoniam confusum est triticum. <sup>18</sup> Quid ingemuit animal, mugierunt greges armenti? quia non est pascua eis; sed et greges pecorum disperierunt. <sup>19</sup> Ad te, Domine, clamabo, quia ignis comedit speciosa deserti, et flamma succendit omnia ligna regionis. <sup>20</sup> Sed et bestię agri, quasi area sitiens imbrem, suspexerunt ad te, quoniam exsiccati sunt fontes aquarum, et ignis devoravit speciosa deserti.]

2 [Canite tuba in Sion, ululate in monte sancto meo, conturbentur omnes habitatores terræ: quia venit dies Domini, quia prope est. <sup>2</sup> Dies tenebrarum et caliginis, dies nubis et turbinis; quasi mane expansum super montes populus multus et fortis: similis ei non fuit a principio, et post eum non erit usque in annos generationis et generationis. <sup>3</sup> Ante faciem ejus ignis vorans, et post eum exurens flamma. Quasi hortus voluptatis terra coram eo, et post eum solitudo deserti, neque est qui effugiat eum. <sup>4</sup> Quasi aspectus equorum, aspectus eorum; et quasi equites, sic current. <sup>5</sup> Sicut sonitus quadrigarum super capita montium exilient, sicut sonitus flammæ ignis devorantis stipulam, velut populus fortis præparatus ad prælium. <sup>6</sup> A facie ejus cruciabantur populi; omnes vultus redigentur in ollam. <sup>7</sup> Sicut fortes

current; quasi viri bellatores ascendent murum: viri in viis suis gradientur, et non declinabunt a semitis suis. <sup>8</sup> Unusquisque fratrem suum non coarctabit, singuli in calle suo ambulabunt; sed et per fenestras cadent, et non demolientur. <sup>9</sup> Urbem ingredientur, in muro current, domos conscendent, per fenestras intrabunt quasi fur. <sup>10</sup> A facie ejus contremuit terra, moti sunt cæli, sol et luna obtenebrati sunt, et stellæ retraxerunt splendorem suum. <sup>11</sup> Et Dominus dedit vocem suam ante faciem exercitus sui, quia multa sunt nimis castra ejus, quia fortia et facientia verbum ejus: magnus enim dies Domini, et terribilis valde, et quis sustinebit eum? <sup>12</sup> Nunc ergo, dicit Dominus, convertimini ad me in toto corde vestro, in jejunio, et in fletu, et in planctu. <sup>13</sup> Et scindite corda vestra, et non vestimenta vestra; et convertimini ad Dominum Deum vestrum, quia benignus et misericors est, patiens et multæ misericordiæ, et præstabilis super malitia. <sup>14</sup> Quis scit si convertatur, et ignoscat, et relinquat post se benedictionem, sacrificium et libamen Domino Deo vestro? <sup>15</sup> Canite tuba in Sion, sanctificate jejunium, vocate cœtum: <sup>16</sup> congregate populum, sanctificate ecclesiam, coadunate senes, congregate parvulos, et sugentes ubera; egrediatur sponsus de cubili suo, et sponsa de thalamo suo. <sup>17</sup> Inter vestibulum et altare plorabunt sacerdotes, ministri Domini, et dicent: Parce, Domine, parce populo tuo; et ne des hæreditatem tuam in opprobrium, ut dominantur eis nationes. Quare dicunt in populis: Ubi est Deus eorum? <sup>18</sup> [Zelatus est Dominus terram suam, et pepercit populo suo. <sup>19</sup> Et respondit Dominus, et dixit populo suo: Ecce ego mittam vobis frumentum, et vinum, et oleum, et replebimini eis; et non dabo vos ultra opprobrium in gentibus. <sup>20</sup> Et eum qui ab aquilone est procul faciam a vobis, et expellam eum in terram inviam et desertam: faciem ejus contra mare orientale, et extremum ejus ad mare novissimum: et ascendet fœtor ejus, et ascendet putredo ejus, quia superbe egit. <sup>21</sup> Noli timere, terra: exsulta, et lætare, quoniam magnificavit Dominus ut faceret. <sup>22</sup> Nolite timere, animalia regionis, quia germinaverunt speciosa deserti; quia lignum attulit fructum suum, ficus et vinea dederunt virtutem suam. <sup>23</sup> Et, filii Sion, exsultate, et lætamini in Domino Deo vestro, quia dedit vobis doctorem justitiæ, et descendere faciet ad vos imbrem matutinum et serotinum, sicut in principio. <sup>24</sup> Et implebuntur areae frumento, et redundabunt torcularia vino et oleo. <sup>25</sup> Et reddam vobis annos, quos comedit locusta, bruchus, et rubigo, et eruca: fortitudo mea magna quam misi in vos. <sup>26</sup> Et comedetis vescentes, et saturabimini; et laudabitis nomen Domini Dei vestri, qui fecit mirabilia vobiscum; et non confundetur populus meus in sempiternum. <sup>27</sup> Et scietis quia in medio Israël ego sum, et ego Dominus Deus vester, et non est amplius; et non confundetur populus meus in æternum.] <sup>28</sup> [Et erit post hæc: effundam spiritum meum super omnem carnem, et prophetabunt filii vestri et filiæ vestræ: senes vestri somnia somniabunt, et juvenes vestri visiones videbunt. <sup>29</sup> Sed et super servos meos et ancillas in diebus illis effundam spiritum meum. <sup>30</sup> Et dabo prodigia in cælo et in terra, sanguinem, et ignem, et vaporem fumi. <sup>31</sup> Sol convertetur in tenebras, et luna in sanguinem, antequam veniat dies Domini magnus et horribilis. <sup>32</sup> Et erit: omnis qui invocaverit nomen Domini, salvus erit: quia